

共同經課-1 使徒行傳三章十二節～十九節

12 彼得看見，就 tùi 百姓講，以色列人 ah，啥事掠 chit-ê 做奇怪？啥事注目看阮，ná 親像阮用家己 ê 才能，á 是敬虔，hō伊行？**13** 亞伯拉罕、以撒、雅各 ê 上帝，就是咱列祖 ê 上帝，已經榮光伊 ê 奴僕耶穌；就是 lín chiah-ê 所送交 ê，koh tī 彼拉多 ê 面前，當伊擬 beh 放伊 ê 時，lín koh m̄認伊。**14** Án-ni lín m̄認 hit-ê 聖 koh 義 ê，反 tng 求伊用一個凶犯 hō lín；**15** lín 害死活命 ê 人君，就是上帝 tùi 死人中 hō伊 koh 活 ê；阮 chiah-ê 做伊 ê 干證。**16** 因為信伊 ê 名，就伊 ê 名 hō chit-ê lín 所看所 bat ê 人勇健；是 hit-ê 對伊來 ê 信 hō伊齊全好 tī lín 眾人 ê 面前。**17** 兄弟 ah，taⁿ 我知 lín án-ni 行是 tùi m̄知影，lín ê 官府也是 án-ni。**18** 獨獨上帝用眾先知 ê 嘴讖語伊 ê 基督所 beh 受 ê 害，伊有 án-ni 應驗伊。**19** 所以 lín tiòh 反悔，來 oát-tng 頭，hō lín ê 罪會得擦消，hō 安樂 ê 日期會 tùi 主 ê 面前來。

共同經課-2 詩篇四篇

1 大衛 ê 詩，交 hō 樂官；用絲絃 ê 樂器。1) 顯明我 ê 義 ê 上帝 ah，我求叫 ê 時，求你應我。我 tī 困苦 ê 中間，你 bat hō 我寬闊。Taⁿ 求你憐憫我，來聽我 ê 祈禱。**2** Lín chiah-ê 上等人 ah，將我 ê 榮光變做凌辱，beh 到 tī 時？Lín 意愛空虛，chhiau-chhē 無影跡，beh 到 tī 時？[Sè-láh]**3** Lín tiòh 知耶和華已經分別敬虔 ê 人做伊家己 ê。我求叫耶和華，伊 beh 聽我。**4** Lín tiòh 驚惶，m̄-thang 犯罪；Tī 眠床裡，心 tiòh 三思，亦 tiòh 肅靜。[Sè-láh]**5** Tiòh 獻義 ê 祭，亦 tiòh oá 靠耶和華。**6** Choē-choē 人講，Chī-chūi 會指示阮甚麼好處？耶和華 ah，求你用你 ê 面 ê 光來照阮。**7** 你 hō 我心內有歡喜，贏過人得 tiòh choē-choē 五穀 kap 新酒 ê 時。**8** 我 beh 安然倒 teh 暈，因為只有耶和華你 hō 我安穩 khiā 起。

共同經課-3 約翰壹書三章一節～七節

1 Lín 想看父疼咱到怎樣，hō咱稱做上帝 ê kiáⁿ；咱也實在是。所以世間人 m̄-bat 咱，因為 m̄-bat 伊。**2** 所疼 ê 兄弟 ah，現今咱做上帝 ê kiáⁿ，將來怎樣，猶未顯明。咱知伊若顯明，咱就親像伊，因為咱 beh 看見伊，照伊實在 ê 款。**3** 見若靠伊 chiah 有 chit 號 òng 望 ê，本身清氣親像伊是清氣。**4** 見若犯罪 ê，也行不法；罪就是不法。**5** Lín 也知伊 bat 顯現是 beh 除去罪；也在 tī 伊無罪。**6** 見若 toà tī 伊 ê 無犯罪；見若犯罪 ê，未 bat 看見伊，也 m̄-bat 伊。**7** 細 kiáⁿ ah，m̄-thang hō 人迷惑 lín；行義 ê 就是義，親像伊是義。

共同經課-4 路加福音二十四章三十六節 b～四十八節

36 耶穌本身 khiā tī in 中間，kā in 講，願 lín 平安。**37** In gông-ngiáh koh 驚，掠做所看見 ê 是神。**38** 伊就 kā in 講，Lín 啥事 jū 亂，心內生起僥疑 ah？**39** Tiòh 看我 ê 手我 ê 腳，就是我本身；摸我，就知；因為神無骨無肉，照 lín 看見我 lóng 是有。**40** 講 án-ni，就將手 kap 腳 hō in 看。**41** 學生為 tiòh 歡喜 ê 緣故，iáu-kú 無信，koh teh 奇怪，伊 kā in 講，Lín tī chia 有甚麼 thang 食無？**42** In 就將 pek ê 魚一片 hō伊；**43** 伊 thèh 去，當 in ê 面前食伊。**44** Koh 對 in 講，Chiah-ê 就是我 iáu-kú kap lín tī-teh ê 時所對 lín 講 ê 話，講見若 tī 摩西 ê 律法，kap hiah-ê 先知，以及詩篇，所記載指我 ê 話 lóng 的確 tiòh 應驗。**45** 就開 in ê 心竅，hō in 能曉悟 hiah-ê 聖經。**46** Koh kā in 講，有 án-ni 記載，基督 tiòh 受苦，第三日 tùi 死人中 koh 活；**47** 也反悔 kap 赦罪 ê 道理 beh tī 伊 ê 名來傳教萬邦，是 tùi 耶路撒冷起。**48** Lín 做 chiah-ê tai-chì ê 干證。